

In die Psalms: Deel 2



SABBATMIDDAG

Skrifverwysings vir hierdie week se studie:

Psalm 46, Jeremia 4:23–26, Psalm 47:1–4, I Thessalonicense 4:13–17, Psalm 75, Openbaring 14:6–12.

Geheueteks: “Die volke sal U loof, o God, die volke almal saam sal U loof. Die nasies sal bly wees en jubel, omdat U die volke regverdig oordeel en die nasies op aarde lei. Sela.” (*Psalm 67:4, 5*)

Wanneer ons aan die eindtydgebeure dink, is ons geneig om op die diere en magte wat in Openbaring genoem word, te konsentreer. En natuurlik speel hulle ’n groot rol, ’n belangrike rol. Andersins sou God hulle nie in die Bybel genoem het vir ons om daarvan te wete te kom nie (*lees Openbaring 1:3*).

Die profetiese Woord behandel egter ook sleutelvraagstukke wat met sonde en lyding, oordeel, die stryd tussen goed en kwaad, die aard van regverdigheid en onregverdigheid, vervolging en nog meer te doen het.

Die Psalms behandel hierdie vraagstukke in groot diepte deur amper elke moontlike menslike emosie te ondersoek — van die donkerste wanhopigheid tot die mees uitgelate vreugde. Ons sien hoe Israel voorberei vir die stryd teen die vorste van die duisternis. Ons lees oor hoe individue worstel met die vraagstuk oor waarom God nie die kwaad meer direk en onmiddellik aanspreek nie, ’n vraag wat ons ongetwyfeld almal al gevra het. Ons word na die heiligdom verwys vir antwoorde, en ons vind ook herhaalde beroepe op God se status as Skepper. Is hierdie nie ook vraagstukke en vrae waarmee ons in ons onderlinge verband vandag worstel nie?

Natuurlik — en dit is waarom ons wil aanhou om die Psalms te ontleed sodat ons meer oor hierdie uiters belangrike waarhede kan leer.

**Bestudeer hierdie week se les ter voorbereiding vir Sabbat, 31 Mei.*

'n Hulp in benoudhede

Lees Psalm 46. Watter boodskap van hoop kan ons hieruit neem te midde van die gewoel van ons hedendaagse lewe en van dit wat ons weet wat oor die aarde in die laaste dae gaan kom soos wat die groot stryd hier besig is om uit te woed?

Dit lyk asof Psalm 46 'n tema aanraak wat ons in die boek van Hebreërs vind: *dit wat beter is*. Jesus is *beter* as die aardse Hoëpriester, Sy offer is *beter* as al die diere-offers, en die hemelse heiligdom is *beter* as die tipes wat op die aarde bestaan het.

Hierdie Psalm het egter 'n ander benadering. Die outeur neem nie goeie dinge en kontrasteer dit met beter dinge nie; hy kontrasteer dit met 'n opstandige wêreld — en met die verskriklike gevolge wat dit veroorsaak het — met 'n belofte van die beter dinge wat God vir ons beplan.

Hierdie Psalm is inderdaad met hoop en belofte gevul, dat selfs te midde van die verlatenheid en beproewing en lyding en oorloë waarvoor ons te staan kom, ons ten laaste alles moet “laat staan en weet dat Ek God is” (*Psalm 46:10*), en moet rus in die versekering dat dit eindig tot 'n einde sal kom en dat “God hoog op die aarde” sal wees (*Psalm 46:11*).

Let ook op wat hier geskrywe is. “Daarom sal ons nie vrees nie, al waggel die aarde en al wankel die berge weg in die hart van die see.” (*Psalm 46:3*)

'n Mens kan nie anders as om te dink aan die tonele wat gaan plaasvind met die Tweede Koms nie: “en die hemel het weggewyk soos 'n boek wat toegerol word, en al die berge en eilande is uit hulle plekke versit” (*Openbaring 6:14*). En ook: “julle wat die koms van die dag van God verwag en verhaas, waardeur die hemele deur vuur sal vergaan en die elemente sal brand en versmelt” (*II Petrus 3:12*). Ons huidige wêreld met al sy bykomstige booshede gaan nie vir ewig bestaan nie, en wat daarna aan die kom is, belowe om iets te wees wat ons gedagtes nou skaars kan peil. Intussen moet ons egter net vashou, ons geloof behou en vasklou aan die openbaring wat ons van God het, veral aan Jesus op die kruis.

Hoe sleg dinge ook al op hierdie aarde is (en ons weet dit gaan al erger word), watter hoop behoort ons uit ons kennis van die goedheid, mag en karakter van God te put (dink: die kruis)?

Hoop te midde van onrus

Baie van die taalgebruik in die boek van Psalms is simbolies, maar wanneer dit by die taal kom wat vooruitwys na die uiteindelijke herskepping van ons planeet, het ons min rede om te glo dat dit net simbolies is. Psalm 46 herinner ons daaraan dat die aarde fisies sal verander wanneer Christus weer kom. Maar dit is nie net die rotse en oseaan wat 'n verandering sal ondergaan nie; die groot klimaks van die aarde se geskiedenis sal veroorsaak dat die wêreld se koninkryke tot 'n einde sal kom – die rampspoedige sisteme van menslike regerings wat soveel lyding deur die eeue heen veroorsaak het.

Aan die einde sal al hierdie magte, en al die boosheid en lyding wat dit oor die mensdom gebring het, tot 'n algehele einde kom.

Lees Jeremia 4:23–26. Wat sê dit aan ons oor die lot van hierdie wêreld, ten minste totdat daar 'n “nuwe hemel en 'n nuwe aarde” sal wees (*Openbaring 21:1*)?

Bybelfrofesie sê aan ons wat met hierdie aarde gaan gebeur. Die visioen van Daniël 7, byvoorbeeld, toon aan ons 'n stormagtige see waartydens die nasies van die wêreld in opstand kom. Die winde van stryd en oorlogvoering waai oor die heidense see (die aarde), en produseer een wêreldkoninkryk na die ander, en nie een van hulle kan die werklike probleme wat die mensdom teister, oplos nie. Die wêreldleiers op wie ons waag om te vertrou, bewys gewoonlik dat hulle net soos die res van ons sondig en selfsugtig is.

Nie een van die koninkryke wat aan Daniël getoon was, het bewys om 'n veilige tuiste vir God se volk te wees nie (alhoewel sommige beter as ander was). Maar ons weet dat ons burgerskap in die koninkryk van God is (*Filippense 3:20*), en hoog bo die chaos van hierdie planeet is daar 'n troon wat nie beweeg kan word nie (*lees Eségiël 1:26*). Jesus het geleer dat die wêreld van erg na erger sal beweeg soos wat die oomblik van Christus se wederkoms nader kom (*Matthéüs 24*), maar ons kan in geloof uithou al versleg die toestand van ons planeet, want ons weet dat God nie beheer verloor het nie, en dat Hy sy beloftes sal nakom: “Nasies het gebruis, koninkryke het gewankel; Hy het sy stem verhef; die aarde bewe. Die HERE van die leërskaars is met ons; die God van Jakob is 'n rotsvesting vir ons. Sela. (*Psalm 46:7, 8*) Op die korte duur gaan dinge nie goed gaan nie, en sal dit ook nie kan goed gaan nie. Op die lange duur? Dit – danksy aan Jesus – is 'n heel ander saak.

Daar is geen twyfel nie, dit lyk asof ons wêreld chaoties en buite beheer is. Hoe behoort die profesie van Daniël 7 ons byvoorbeeld te help om te sien dat dinge uiteindelik vir ons reg sal uitwerk as ons getrou bly?

Onder Sy voete

Lees Psalm 47:1–4. Wat sê dit oor ons uiteindelijke plek in Christus se koninkryk?

Op die lange duur lyk die toekoms blink. Maar tot dan het die mens die heerskappy van hierdie planeet aan Lucifer gesedeer, en teen die tyd wat Satan by die hemelse raadsvergadering opgedaag het volgens Job, het hy gespog dat hierdie aarde aan hom behoort. “‘Waar kom jy vandaan?’” het God hom gevra. “‘Van ’n swerftog oor die aarde, wat ek deurkruis het,’” het hy geantwoord (*Job 1:7*).

Satan het sy *eienaarskap* verklaar; die voet was in die antieke tye gebruik om eienaarskap te verteenwoordig. “‘Maak jou klaar, trek die land deur in sy lengte en sy breedte,’” het die HERE aan Abram gesê, “‘want Ek sal dit aan jou gee’” (*Genesis 13:17*).

Vergelyk I Thessalonicense 4:13–17 en Sagaria 14:4, en let op na Christus se voete. Watter verskil vind jy tussen hierdie skrifgedeeltes, en wat leer dit ons oor hierdie twee verskillende en tog verwante skrifgedeeltes oor aspekte van Christus se uiteindelijke heerskappy van hierdie wêreld?

Ellen G. White skryf die volgende oor wat Christus aan die einde van die millennium gaan doen: “Christus daal neer op die Olyfberg vanwaar Hy na Sy opstanding opgevaar het en waar die engele die belofte van Sy wederkoms herhaal het. Die profeet sê: ‘Dan sal die Here my God kom, al die heiliges met U!’ ‘In dié dag sal sy voete staan op die Olyfberg wat voor Jerusalem lê, aan die oostekant; en die Olyfberg sal in twee dele gesplyt word . . . sodat daar ’n baie groot dal sal wees; . . . En die HERE sal Koning wees oor die hele aarde; in dié dag sal die HERE een wees, en sy Naam een’, Sagaria 14:5, 4, 9. Wanneer die Nuwe Jerusalem in verblindende heerlikheid uit die hemel neerdaal, sal dit tot rus kom op die plek wat daarvoor gereinig en gereed gemaak is en Christus met Sy volk en die engele sal die heilige stad binnegaan.” — Ellen G. White, *Die Groot Stryd*, bl. 662-663.

Beskou die hoop wat aan ons in Jesus gegee word. Dink oor hoe moeilik die lewe sou gewees het as alles vir ewig by die dood tot ’n einde sou kom. Dit sou alles tevergeefs gewees het, nie waar nie?

Wyn en bloed

Lees Psalm 75. Lees ook Matthéüs 26:26–29 en Openbaring 14:9–12. Wat onthul hierdie Psalm oor sommige van die kwessies ter sake in die oordeel, en hoe help hierdie ander verse ons om hierdie kwessies te verstaan?

Daar is 'n beskouing dat hierdie Psalm tydens die wonderbaarlike verdelging van Sánherib se krygsmag gesing was (*II Kronieke 32, II Konings 19*) — 'n verhaal wat lyk asof dit na die finale vernietiging van die goddelose mense in Openbaring 20, vooruitwys. Die volk van God is in die Heilige Stad saam met hulle regverdige koning wanneer die bose leërs versamel en hulle omsingel, en dan word hulle deur God self uitgewis.

Een van die dinge wat God in die oordeel gaan regstel, is die misbruik van mag wat al in ons gevalle wêreld plaasgevind het en nog steeds plaasvind. Die gevalle mens leef nie meer vir ander nie, of tot die eer en heerlikheid van God nie, maar net vir hulleself. Die mens leef vandag in baie opsigte met die gevolge van sy eie keuse deur te glo dat daar geen betekenis of objektiewe morele standaard in die heenal is nie. Indien daar wel sou wees, het die filosoof Friedrich Nietzsche daarop aangedring dat ons dit vir onself moet uitvind, en dan moet voorgee dat die heenal tot ons eie voordeel bestaan. Elke individu tree dan op asof hy of sy 'n god is.

'n Mens kan dan regmatiglik vra: *Hoe goed het hierdie filosofie vir Nietzsche self uitgewerk?* Eintlik nie te goed nie. Hy het kranksinnig geword en ineengestort in 'n straat in Italië nadat hy probeer het om 'n man te stop wat 'n perd geslaan het. En hy het toe in die daaropvolgende 11 jaar van sy lewe in 'n semi-katatoniese (kranksinnige) toestand deurgebring voor sy dood in 1900.)

Hoe erg die probleme ook al is, word ons as gelowiges daaraan herinner om met hoop te lewe, en om nie die toekoms volgens die sake van die dag te voorspel nie. Dit is maklik om wanhopig te word wanneer ons sien hoe die beskawingstandaarde stadig maar seker verdwyn weens die verkeerde optrede en denke van goddelose mense, of weens verkeerde sienings wat nie in die Bybel gevind word nie. Ons leef tans in 'n tydperk waar morele waardes, selfs dinge soos basiese geslagsidentiteit, manlik of vroulik, bedreig word, ten minste in sekere wêrelddele. Sekere tipes onsedelikheid, dinge wat baie mense te skaam sou wees om te noem, selfs in die geheim, word nou in die openbaar geprys en toegejuig. Dit is hoe dinge agteruitgaan.

Hoewel ons ons deel moet doen om die lewe vir ander beter te maak, waarom is dit altyd belangrik om te onthou dat dit die totale vernietiging van hierdie huidige wêreld en daarna die bonatuurlike herskepping daarvan gaan kos, voordat alle dinge uiteindelik ten volle herstel sal wees?

Sodat U heil geken kan word

Lees Psalm 67. Hoe help hierdie loflied jou om te begryp wat die rol wat God se volk in Openbaring 14:6–12 is?

Ingenieurs by MIT (Massachusetts Instituut vir Tegnologie) het 'n nuwe swart verf ontwikkel wat voorwerpe amper onsigbaar laat lyk. Deurdat dit van nanobuisies gemaak word, is dit baie donkerder as enige ander swart materiaal wat al ooit gemaak was. Hierdie nuwe materiaal kan 99.995 persent van alle sigbare lig absorbeer. Selfs die helderste lig slaag nie daarin om voorwerpe wat met hierdie verflaag gedek is, sigbaar te maak nie.

Psalm 67 begin met 'n oproep tot God om “sy aangesig by ons [te] laat skyn! . . . Sodat die mense op aarde U weg kan ken” (*Psalm* 67:2, 3). In die plan van verlossing het God 'n weg vir sondaars voorsien om weer in sy onmiddellike glorieryke teenwoordigheid toegelaat te word sonder om deur sy heerlikheid vernietig te word; en selfs nou, in hierdie lewe, maak die kruis van Christus dit moontlik vir God se aangesig om oor ons te skyn.

Maar daar is nog meer: God se doel is dat ons sy Lig aan die res van die wêreld moet weerkaats. Hierdie was die taak wat aan Israel gegee was: die tempel moes 'n huis van gebed vir alle nasies gewees het: “ ‘hulle sal Ek bring na my heilige berg, en Ek sal hulle vreugde laat smaak in my huis van gebed; hulle brandoffers en hulle slagoffers sal welgevallig wees op my altaar, want my huis sal 'n huis van gebed genoem word vir al die volke.’ ” (*Jesaja* 56:7)

In hierdie Psalm herinner Dawid ons aan wat God wil hê: “Sodat die mense op aarde u weg kan ken, onder al die nasies u heil.” (*Psalm* 67:3) Dis tragies dat God se volk dikwels in hierdie taak gefaal het. Israel se geskiedenis in die Ou Testament bevat 'n paar donker hoofstukke, en so ook die geskiedenis van die Christelike kerk gedurende die laaste twee millennia. Dit is asof ons ons harte met 'n donker swart verf bedek het en tevrede is om God se lig te absorbeer sonder om dit te weerkaats.

Soms hanteer ons God se eindtydbeweging as 'n tipe luukse vertreksaal wat vir passasiers wat geestelik ingestel is en dikwels vlieg, gereserveer is, en ons lyk nogal baie tevrede dat die res van die wêreld in 'n raserige ongerieflike wagkamer naby die uitgang moet sit, onvoorbereid vir die reis wat voorlê. Die oorblyfselkerk van Openbaring 14 is egter nie tevrede om net op Sion saam met Christus te staan en sy teenwoordigheid te geniet nie. In plaas daarvan vlieg hulle heen en weer oor die aarde heen en pleit met die wêreld om by hulle op God se heilige berg aan te sluit.

Hoeveel behoort ons as 'n kerk, en as individue, te doen om die waarhede wat ons so liefhet aan ander oor te dra?

Vir verdere studie: Lees Psalm 133, Handeling 1:4–9 en Openbaring 5:4–7.

“Gedurende die patriargale tydperk is die invloed van die Heilige Gees dikwels op ’n besondere wyse geopenbaar, maar nooit in Sy volheid nie. Gehoorsaam aan hulle Heiland het die dissipels nou om hierdie gawe gebid, en in die hemel het Christus Sy voorbidding daaraan toegevoeg. Hy het die gawe van die Gees geëis sodat Hy dit op Sy volk kon uitstort.” — Ellen G. White, *Die Handeling van die Apostels*, bl. 37.

Die dissipels was opgelei om van Christus te getuig “ ‘tot aan die uiterste van die aarde’ ” (*Handeling 1:8*), ’n werk wat die wederkoms van Christus sou aankondig (*Matthéüs 24:14*). Ons moet voortbou op wat hulle begin het.

Toe Christus aan ons gesê het om die evangelie aan die wêreld te bring, het Hy ons nie alleen gelos om te probeer uitvind hoe dit gedoen moet word nie. Die werk word vanuit die hemel se heiligdom uitgedeel. Ons werk is om baie nou met Christus te verbind: Hy lei ons en stel ons in staat. Dit is Sy werk, nie ons s’n nie: ons word gevra om Hom te volg. Jy sal agterkom dat dit vir Israel so gewerk het: God het hulle gevra om Sy instruksies te volg, en toe het Hy die onmoontlike laat gebeur. Die Gees is alreeds aan die werk in die harte van ons bure; ons word net gevra om gereed te wees wanneer die oomblik vir besluitneming reg is, sodat ons hulle kan uitnooi om by God se volk wat saam met die Lam op Sion staan, aan te sluit. Ons hoef nie nuwe middele en metodes te ontwikkel nie, want ons was nog nooit in beheer van die werk nie.

Vrae vir bespreking:

- ❶ Daar is baie onbereikte mense, selfs al was die drie-engeleboodskappe oor die hele wêreld verkondig. Bespreek in die klas hoe ons as ’n kerk die taak wat Christus aan ons gegee het, beter kan uitvoer. Hoe kan ons leer om nie wanhopig te wees omdat dit waar is dat so baie mense nog nie hierdie waarhede vir die laaste dae gehoor het nie?
- ❷ In Openbaring 5 sien Johannes hoe die verseëelde boek aan die Lam gegee word om dit oop te maak, omdat Hy waardig is. Wanneer die seëls van die boek in Openbaring 6 oopgemaak word, sien ons hoe die geskiedenis van die Nuwe Testamentiese kerk duidelik voorspel word tot aan die einde van tyd. Watter lesse kan ons uit hierdie voorspelling leer oor hoe God van plan is om die werk klaar te maak?
- ❸ Watter huidige gebeurtenisse sien ons in die wêreld wat maklik kan lei tot wat Openbaring 13 en 14 voorspel wat gaan kom? Watter struikelblokke bly oor?